

四庫全書

集部

欽定四庫全書

集部

見彙集奏議卷二

詳校官中書臣賈鉞

中書臣劉源溥覆勘

覆校官中書臣汪學金

校對官助教臣蔡鎮

謄錄監生臣羅善慶

欽定四庫全書

見素集奏議卷二

奏議十七篇

西巡稿

撫處王武等疏

題為修政本以弭大盜事節該欽奉敕江西賊情重大  
茲特命爾前去巡視彼處地方爾至彼廣詢博訪深究

明 林俊 撰

事情嚴督所司設法撫捕務令盡絕凡有興利除害弭盜安民良法悉聽爾便宜處置欽此欽遵行據江西布政司呈准分守南昌道右叅政王綸咨抄蒙巡視案驗即將王武等親自省諭本分農業毋再懷疑執拗搆黨召禍弟姪手下嚴加禁約不許指以捕盜妄拏平人報復讐怨誣擄財物姦騙婦女燒燬房屋非對賊陣務在生擒不許斬首且王武等名不在官性猶近野羣居互長則禍累易生私食盡公則人情難久陽訶陰護默奪

潛消必有可乘之機善處之術會議通呈等因會同南昌道分巡僉事王純親自省諭王武等本分耕種不許多集無賴生事擾人招尤啓釁外議得王武已故房兄王再瑛始雖為盜尋亦革心自首助官擒拏首惡致被逋誅餘黨讐殺七命後王武率先兵便效順竭勞前後斬獲一百四十餘人今又聽撫求哀宜加善處合行瑞州府知府周津通判甘文紹將王武弟姪手下一名名研審真的年貌籍貫異省者資給衣糧查發附近者省

令農業生理但王武住居與吳城相近孤懸賊壘肆衝賊路而吳城又當高安上高新昌奉新交界之處合無吳城築立官堡高安輪撥機兵一百名同上高新昌各縣捕盜主簿輪差一員住彼提督各給行糧常川操守一季一換王武地方再立民哨止許招募五十人王武為哨甲弟姪王昌王宏并手下姚惟高五人為哨手每手管九人一人為非九人同哨甲覺舉違者連坐俱聽官堡鉗束無事幹家有警聽調朔日赴該府望日赴該

縣呈遞甘結聽候發放其工雇之資每年哨甲六兩哨手四兩哨丁三兩將已決並監故賊首鄧遲八李昌三周申三等舊遺田產查勘明白近者撥種遠者兌換名為哨田止納正糧之外不編別差量其歲收以足前數倘有不敷或支官錢增置或僉均徭津貼仍自高安直抵新昌每二十里立一鋪舍編僉司兵修理路道使文移絡繹公私經行府縣按月查點上司不時巡歷或寓宿官堡就近行事擾習既久性度自馴易荒阻為通衢

薰克梗為善俗聲迹相倚彼無內顧之憂動靜易聞我  
獲永終之吉等因到臣隨據按察司呈同前事案照先  
據周津甘文紹稟稱便手王武王昌並手下二十餘人  
出官聽撫已經宣示恩威嚴加省諭及行道府犒賞議  
處去後今呈前因臣看得王武年始二十一歲兵僅數  
十餘人徒以粗勇為賊憚怯自知府劉璣撫恤之厚周  
津甘文紹羈督之勤重以鎮巡震懾之威該道守巡王  
綸王純繼事同功警服之至節嘗為官獲賊思免罪尤



祇陷宿讐浮詞挾訴心懷驚沮迹類桀驚急緩兩圖均  
若可諗功過兼使宜若可為矧瑞賊乍違乍順人無定  
心亦司府欲撫欲擒官無定信今王武等既出就撫待  
之當誠久若重違取之亦易使隸名于籍寄食于官非  
惟須其實用抑且杜其他謀議為有見除照奉欽依便  
宜處置事理案行各該衙門依擬施行外緣係撫處兵  
便安戢地方並修政本以弭大盜事理謹具題知

正事體以別嫌疑疏

奏為正事體以別嫌疑事臣近蒙聖恩改都察院右僉都御史巡撫江西者俟命怖惶俯躬跼踖竊念臣二親老邁百志衰頹供職兩年乞歸五疏未蒙俞允又有江西巡視之差私心揣量此老馬末程也接喘交汗以盡報顧復深恩尋脫馬羈未為失計不謂僅踰兩月重荷差除臣敢不知幸而知報哉但念巡撫都御史韓邦問出臣訪奏同旨批代似涉嫌疑情義未安昔宋臣朱熹劾提刑唐仲友尋奪其命授熹熹不拜包拯劾三司使

宋祁尋解其職授拯拯不辭為歐陽修所彈謂蹊田奪  
牛豈得無過整冠納履當避可疑其於朝廷所損不細  
臣事迹實類此臣敢不以烹為法拯為戒者哉且江西  
事劇非他省比邦問才識非臣比邦問巡撫不稱更繁  
用臣所謂一蟹不如一蟹者也臣往以更繁代張撫後  
效竟不及撫今又代邦問後效豈及邦問臣豈敢竊虛  
美邀實累哉伏望聖明曲垂憐處另擇才賢巡撫江西  
停臣別叙惟復容臣照舊巡視完日歸老庶事體正辭

金匱要略卷二  
受明無形迹之嫌有肢骸之所不勝至幸緣係正事體  
以別嫌疑事理謹具奏聞奉聖旨林俊不准辭著用心  
巡撫地方吏部知道欽此

### 災患疏

題為災患事據江西布政司呈南安府申大庾縣老人  
甘文瑞等呈本縣城市鄉村軍民男婦自弘治十六年  
正月中旬以來多感喉風腫毒急證辰病午死或即時  
死或在市買賣入門即死一家三五口者有之六七口

者有之男女痘疹死者不可勝數家家遍染前災上猶  
縣老人李清秀等呈自弘治十五年十二月以來本縣  
坊廂龍下童子等里耕牛猪畜沾患時氣俱已災死今  
年正月初旬市井村團軍民多感風痰咽喉急證朝病  
暮死全家遍染湯藥無人葬無虛日悽愴驚惶呈乞急  
救等因備申轉呈前來查得先據該府申前事已經行  
令發粟拯濟官備藥餌多方醫治貧無棺木量為措置  
去後今呈前因臣看得江西司衛府縣庫乏存積銀兩

倉少預備稻穀俸糧歲欠八萬四千餘石物料歲欠三萬二千餘兩瑞州之強盜稍息南康之饑民又起左按右過東出西沒今南安災青盛行老稚卒中或一家俱病或數口俱死下至牛畜俱各被災是皆及身之切禍非垂象之隱然雖令乘時發粟施藥給棺終為無財所窘况南安又與韶州惠州汀州郴州等處相連萬一流賊乘虛為患非細臣技窮當局憂切涉冰除再行守巡兵備等官嚴加提備及督屬辦藥措棺處置牛具賑恤

修省外緣係災患事理謹具題知

查報擒獲盜賊為各官開俸疏

題為地方賊情事據江西布政司呈准本司分守南昌  
道右叅政王綸咨自弘治十五年正月起至弘治十六  
年三月十二日止督據南昌道所屬瑞州等府捕盜通  
判等官甘文紹等陸續獲過各起強盜並窩主賊屬共  
六百四十四名口瑞州府獲過強盜四百八十三名窩  
主五名賊屬一口南昌府獲過強盜一百五十名窩主

一名賊屬四口并原帶管湖西道所屬吉安臨江袁州等府共獲過強盜一百零四名等因到臣行間又據江西按察司呈准本司分巡南昌道僉事王純關同前事查為地方緊急賊情事該鎮巡等衙門會案備奉勅內事理查各衛所府縣掌印巡捕及三司守巡等官戴罪拏賊賊未盡絕不許支俸又為修政本以弭大盜事臣案行守巡等官督屬將未獲賊犯設法挨拏務令盡絕去後今據前因臣看得江西各府盜賊瑞州為多自奉



勅切責之後鎮巡官牌催案督寢不敢寧守巡官王綸  
王純守併坐臨勞不敢息知府劉璣周津捕盜通判甘  
文紹叅籌授算智取力攻及掌縣事通判施堯臣知縣  
童旭謝樞巡捕主簿劉銘潘崇典史胡冕等亦各畏威  
供事以致惡魁克黨次第成擒是皆陛下神威聖武諸  
司効命之攸致也臣至之時賊已衰謝及今似乎小康  
雖狐遊鼠出迹難盡除而蟻聚蜂屯勢難遽滅除將各  
犯先已問結及後獲行審無冤問報未獲仍行緝捕務

期盡絕以靖地方外所據各官并賊少地方官員俸糧似合暫容一體關支以作其勤若各賊再縱另行區處緣係暫容支俸及地方賊情事理謹題請旨

更調官員疏

題為修政本以弭大盜事據江西南昌府申本府所屬奉新寧縣俗野民頑訟繁事劇奉新縣知縣徐南懈弛遜悞寧縣知縣董壽鵠鈍迂徐以致糧料歲逋盜賊日縱吉安府申所屬永新縣刁豪旁午強竊陸梁知縣羅

煥性頗近遲才非任劇南康府申所屬建昌縣知縣石  
璫邑事欠修民心多玩局才具位養盜殃人俱合奏調  
事簡縣分別選賢能以舉縣政等因到臣看得徐南董  
壽羅煥石璫操存無害施置委疎矧丁紛結之期尤宜  
解紓之急及訪吉安府安福縣知縣李如圭廣信府弋  
陽縣知縣王誥俱各年少性剛疾惡太甚跡孤怨結預  
合保全如蒙准題乞勅吏部叅詳臣奏果有可采將徐  
南董壽羅煥石璫議事簡縣分李如圭調建昌王誥調

奉新其寧縣永新安福弋陽四縣別選閥敏練歷廉剛  
有威進士銓註奏取聖裁給憑嚴限赴任庶官使得人  
政平訟理而盜賊自息緣係更調官員及修政本以弭  
大盜事理謹題請旨

復州治疏

題為復州治以制強禦事據江西布按二司守巡南昌  
道右叅政王綸僉事王純呈據南昌府寧縣儒學廩增  
生員戴邦哲等該縣里老陳淮等各連名具呈本縣上

接湖廣瀏陽下連武寧奉新靖安荒僻阻險人民豪橫  
或招納強僕或養交俠客百十為羣歆盟自結辯者搆  
訟謀勇者習拳棒爭雄角勝執杖持兵植黨聚徒奪牛  
搶穀倚人命則屋舍為墟誣賊情則雞犬殆盡奏告連  
年身不出官糧里終歲足不到縣匿卷案關已者百不  
一存邀公文提人者十無一到鄉民被其吞食官長遭  
其謾罵近年以來尤為尾大不掉滋蔓難圖是固地險  
之足憑抑亦職輕之易侮緣本縣舊為寧州國初改寧

縣乞復州治以制強禦等因備呈到臣案查先據知府祝瀚呈前事臣拘滯成格止將該縣知縣董壽才力不及緣由題行吏部議調未報今又各呈前因臣公同守巡知府等官親臨訪處縣在萬山之中陸多峻崖水多惡灘舟車艱虞上司不到喜爭好亂誌錄舊風陷吏抗官鄉襲常態委的民極頑梗縣難鉗束臣雖稍裁惡首未能終絕禍根如蒙乞勅吏部叅詳臣奏將寧縣奏復為州官改別用另選風力知州等官管理庶職重易臨

民乃可制緣係復州治以制強禦事理謹題請旨

論寧府用琉璃瓦疏

題為酌大義以全賢孝事臣日者審寧殿下累乞琉璃瓦重荷聖俞於引錢內支二萬兩給換者臣有以仰窺陛下聖仁廣大惇叙九族盛心而寧王據禮守經不為無見然觀鎮巡議奏欲俟年豐定奪是巽言不當與也工部覆奏謂規制雖相應事體實可止又恐重累地方作例各府是正言不當與也迨寧王又奏工部又執奏

是申言決不當與也陛下先可部議是明示不當與後  
從其半是婉示不欲與也士夫及耆壯公論謂寧府多  
此一舉是中外人心皆謂不當與也寧王讀書明理聰  
察識事斷不為此必勝以損賢名偶未之思耳夫事有  
可為有不可為有可已有不可已江西公私匱竭人民  
滋困盜賊未息此何時也意者引錢無預於民不知存  
積僅二萬七千餘兩益府宮殿蟻蠹益殿下見移東寢  
萬分驚虞責將誰任修蓋之費約三萬餘兩此不可已



者也淮府造墳順昌王崇安王鎮國將軍起第已支五千三百餘兩後來未計此不可已者也所在儒學文廟傾頽問其故謂科罰例嚴所司顧忌不修之致此不可已者也各處預備倉穀數少問其故謂罰贖解部所司計無自出之致此不可已者也官軍俸糧通融節縮歲支尚少四萬四千餘石此不可已者也臣嘗見楚府殿燬久未蓋荆府多敝漏淮府同一江西頽垣朽柱東柱西撐飄瓦斷椽脫落大半居然廢址在民庶尚不堪居

惟寧府完美堅緻金碧燦煌夫大義不可已有可為割  
財內帑為之未過也有可已無可為又何必為此等事  
哉古者采椽不斷茅茨不剪土階贊堯卑宮贊禹儒服  
紀河間樂善紀東平湘州之約儉鎮西之輕財聖帝明  
王所以揚盛休垂後美者端亦在是寧府移封之初親  
至親也已不用琉璃再造之會國至富也又不用琉璃  
豈亦慕采椽茅茨之盛崇古獨質示樸以垂憲如此如  
此哉今歷百年傳數世一旦無故而遽改之孝子順孫

所以順祖考者義不當是夫前之失後人尚諱之前之  
善後人忍改之耶改則盡歿之矣歿之非孝子歿之非  
順孫謂賢王忍為之耶臣所謂偶未之思者也況性習  
難靜易動難儉易奢操之猶懼或放縱之何往不流賢  
王春秋方盛德業方始求之身心自有專務而規規循  
常文具之間以毀鱗前人法則臣未知其可臣數侍賢  
王言論多師法古又誤被禮愛獨至臣服深感切私亦  
當厚顧若無右於賢王臣罪死罪死臣往年疏府第之

制以不用琉璃美寧先王義不當以用琉璃諛今王且  
小人先合後忤君子和不尚同臣欲愛德市義完賢名  
不欲貢諛順旨虧至孝孟軻曰齊人莫如我敬王臣拘  
儒不識通變但知報王道當如此竭忠盡愚事陛下道  
當如此寧王靜思幡悟必有創於臣言伏望聖明篤懿  
親斷大義垂善處使賢王德如純璧名若完甌毋涉吳  
王几杖之賜叔段京鄙之求正大明白恩不掩義為世  
世頌美幸甚臣無任隕越俟罪之至緣係酌大義以全

賢孝事理謹題請旨

巡撫謝恩疏

奏為謝恩事臣先官南京都察院欽命巡視江西尋蒙  
聖恩改官巡撫衷嫌引避睿注莫回申命式臨跼躬無  
措竊念臣性愚且戇超廁清銜跡孤以危早投閑局意  
深銜木倦還轉負於初期病切思槽專策顧申乎末路  
臣敢不仰酬知遇懋罄謏庸審方今震撼之原修近古  
懷柔之政庶使江西之民頌周風之仁厚樂舜治之雍

熙臣無任感激天恩之至除望闕謝恩外謹具奏聞

進繳巡視敕書關防疏

奏為進繳敕書關防事節該欽奉敕江西各府盜賊近來尤甚特命爾巡撫彼處欽此臣先任南京都察院右僉都御史奉敕提督巡江兼管操江續奉敕巡視江西欽遵將提督巡江關防並操江文卷咨送該院右都御史張敷華暫管臣離任前來弘治十五年十二月十三日到江西二十六日巡瑞州又巡上高巡新昌又巡瑞

州弘治十六年正月十七日回省本年二月初四日巡  
進賢欲巡撫州聞南康饑民羣起搶穀遂巡餘干巡饒  
州巡都昌巡南康地方已靖又巡湖口巡彭澤巡九江  
巡瑞昌巡德安巡建昌巡武寧巡寧縣巡奉新巡靜安  
又回奉新巡瑞州饒州饑民又搶穀臣又欲巡饒州五  
月初六日經省城奉敕命臣會勘董讓王哲事情留候  
給事中等官湯禮敬等到同行關事催督守巡俱至饒  
州嚴加禁治一面賑濟地方又靖其餘府縣未及巡歷

荷蒙聖恩改官巡撫除欽遵施行及將編定均徭里長  
稅糧等項造冊另繳外今將原奉提督巡江兼管操江  
並巡視江西敕二道原領巡視關防一顆具本差人齎  
捧謹具啓奏聞計繳敕二道關防一顆

水患疏

題為水患等事據江西布政司呈准本司左布政使林  
泮咨准本司咨據贛州府瑞金縣申據里老鍾永聲等  
呈稱弘治十六年五月十四日以來霖雨不止十八日



早大雨如注已時分江水洶湧汎漲滿城田園推成沙壩道路陷成深坑東門城樓城門俱各衝倒預備倉穀儒學倉米淹浸一尺有餘週圍內外城垣坍塌百十餘丈近河民房財物牲口漂流罄空故老相傳自昔罕見又本年二月以來各鄉虎狼縱橫人被傷亡不可枚舉至今人絕往來似此災異相繼民不聊生等因備申到司又據本府龍南縣申本年五月初二日起靈雨連綿山溪水漲至本月十七十八日連被上蒙裏營西河三

江洪水齊到又添大雨城內水溢官民房屋儒學衙門有浸至屋簷有浸至四尺預備儒學等倉街民房屋多被淹倒本縣監房儒學公廨城垣衙門牆壁俱各倒塌至本月十九日方止丈量得外城倒裂二十五丈二尺內城倒裂九丈四尺及據本縣坊五圖里老張崇等呈稱陡被洪水將大小陂圳各民所種晚田有水衝成湖有沙積成堆人民愁嘆等因又據本府會昌縣申本年五月初旬以來靈雨淋漓本月十三日起至十八日止

晝夜驟雨洪水汎漲田禾多被衝淹城垣多致倒塌近  
河軍民房屋崩倒四十餘家況又連日北風寒如九月  
以致禾苗不秀等因各申到司案查先為地方事據南  
昌府申據南昌縣申弘治十六年三月初七日民人涂  
寬家母猪生下小豬一十二隻內有一隻未分陰陽一  
頭二身八足緣係怪異呈轉到司備咨到職會同江西  
按察司掌印副使沈銳議得贛州府所屬瑞金龍南會  
昌三縣俱於本年五月內被大水衝塌城垣淹浸倉糧

損壞官民房屋推壓早晚田禾係干邊城民患合行修理賑卹其瑞金縣傷人虎狼合行募捕南昌縣豕產怪異合行瘞埋將議處過緣由會案轉呈定奪等因到臣會同鎮守太監董讓巡按監察御史姜實議得江西地方盜賊稍息未絕人心粗定易搖其南安贛州二府俱係本省邊境重地先是南安屬縣已有喉病暴死之災近來贛州屬縣又有大水漂沒之患况虎患作於邊縣豕禍見於省城考之漢臣蔡邕曰政有苛暴則虎狼食

人文獻通考曰豕生八足下不一也凡此災異皆由臣等與有司不職之致臣等待罪鎮巡曷勝驚懼竊惟變不虛生事宜先慮除南安府災患先已具題及案仰都布按三司各行所屬衛府所縣等衙門並臣等痛加修省仍行嶺北道守巡親詣贛州府分投查勘三縣前項水患是實將城垣倒裂者作急修理倉糧浸瀾者搬晒賤糶其漂流房屋缺食軍民應安插者安插應賑濟者賑濟水衝沙壓田畝堪改耕者再種應申災者勘報衙

門公解牆垣傾頽損壞者斟酌財力漸次修葺仍督瑞金縣招募捕戶將傷人虎狼多方捕打務使軍民安業地方無虞緣係水患等項事理謹具題知

請復常平疏

題為備糴本以復常平事臣聞古無常豐之歲而民不患於不給無他積之有豫也夫民司命者官而恃以為命者穀穀不積民有衣寶玉而死者矣故預備之計於民最急今江西所屬預備倉穀湖口縣不及一千石彭

澤縣不及六百石石城縣僅二千有奇泰和大縣亦僅  
八千有奇其餘積蓄俱少臣竊憂之夫凶則散豐則斂  
官府常規散則樂斂則怨人情大致詭名冒領適長市  
道之奸抵斗追還竟諧里老之計公催稍急則交扇互  
搖巧呈哀訴只得停止以致數縮于官有出而無入約  
爽于民有借而無還出非原泉運非神鬼伊何能繼今  
欲公私兩便惟有常平可復而已查得近例一里約積  
穀一千五百石江西衛所姑未概論試以有司言之六

十九縣總計一萬一百四十五里穀以一里千石計之  
尚該一千一十四萬五千石見在所積十未及一約少  
九百萬石每穀五石作銀一兩該銀一百八十萬兩盡  
括司府庫藏不盡一十萬兩糴本羞澀力難求濟是外  
非重罰罪囚則勒勸大戶取彼與此仁者不為況今法  
日以弊難開勸罰之門義日以衰難求輸助之戶若棄  
是不務則今年直小荒耳待哺嗷嗷聚羣搶穀南康起  
九江起饒州又起熄之復炎痛之而無畏萬一大荒其



無尤甚者乎是正謀國所當預處者也宋仁宗時嘗出  
內庫百萬緡以助糴本今日內庫臣未敢知若承差吏  
典納銀之例又妨政體彼善之法冠帶尚義猶可行耳  
伏望聖明軫念江西為控扼楚蜀閩廣擁護金陵要地  
人民凋瘵之餘垂仁加卹特敕該部計議奏行布政司  
招納義民官一千名除問革官吏外不拘本省別省客  
商軍民舍餘老疾監生廩增附學吏典及子孫追榮父  
祖各聽納銀七十兩者授正七品五十兩者正八品四

十兩者正九品各散官二十兩者冠帶榮身監生減十之三廩膳減十之二陸續填給收完銀兩分俵各縣以資糴本各該冠帶雖不免其差徭亦用加之禮貌毋妄點罰毋輕差遣使絕陵轢樂於順從其不願冠帶願立表義牌坊者若出穀二百石亦容蓋豎不限不停以補官乏臣又見凡問口外為民邊遠充軍罪囚或逃而不  
去或去而即逃徒名治奸無益事實乞敕法司計議除情重外如扛幫誣告強盜人命不實誣告十人以上因

事忿爭執操兇器誤傷傍人勢豪不納錢糧原情稍輕  
不係巨惡叅審得過之家願納穀一千石或七八百五  
六百石容其自贖免擬發遣其誣告負累平人致死律  
雖不摘情實猶重並窩藏強盜資引逃走抗拒官府不  
服拘捕本罪之外量其家道勸穀自五百石至一百石  
以警刁豪俱由撫巡叅詳無容司屬專濫臣仍與巡按  
督併二司專責守令於囚犯紙米並應追贓罰工價逐  
旋存積務取數足為期不容分外科罰如縣一十里則

積一萬石二十里則積二萬石糴本精選該縣行檢富戶量力領買上上六百石次四百石次三百石又次二百石不許市民公役冒領侵費專廩收受名曰常平如秋成穀賤六石糴入春夏穀貴五石四斗糴出秋成五石糴入春夏四石五斗糴出每石明扣一斗以備折耗存積俱令社長社正開報貧民每丁止買二錢以杜兼利前項銀兩當令前該富戶給領秋成照價糴入穀貴依前糴出循環如常若穀賤年分不必發糴仍別查弘

治十四十五十六三年放過饑民稻穀量追一半如借  
一石者追五斗另厥收受審實極貧倍加賤糶如時一  
錢四斗則與六斗果甚孤獨無歸委難自糶方與賑濟  
不必追還若得過冒領問罪之外每穀一石罰穀十石  
衛所常平亦依此法衛一萬石所二千石為則各該掌  
印有司考滿叅定殿最軍職管事酌取去留所貴上下  
相資人法並任同心遠大之圖用復常平之政臣再勸  
社民各立義倉與義學義塚例置名曰阜俗三義盡一

義者書一義之門二義三義稱是義倉之畧社中富民  
任其出穀六百石或四百石別處一倉極貧利一分次  
貧利二分春借秋還轉相調助民樂表異似亦有從若  
常平既復社倉又行則饑饉有備而地方可保無虞此  
預備至計子民至急而江西今日尤為急者伏惟聖明  
留意臣不勝大願緣係備糴本以復常平事理謹題請  
旨

均平稅糧鹽鈔疏

題為修政本以弭大盜事據江西布政司呈准本司左  
布政使等官林泮等咨抄奉巡視案驗照得弔查坐派  
糧冊頗屬均平但地險遠者利輕齎地近便者利本色  
尚疎適事之宜私其民者曲申請私其鄉者妄奏豁未  
杜搖言之惑折色改通派尚庇專利之家五斗撥存留  
顧長洒糧之弊歲用不足須別通融歲納愆期須申則  
限况免淮南祿存折名項數多鄉民難於備曉糧里易  
得藏奸又戶口食鹽錢鈔起解有定額徵收無定丁尤

便縮伸影射之謀欲燭幽微須立簡易看得左布政使  
林泮管糧左參議黃皞慎密老成合委編派仰抄行各  
官即將所屬稅糧從公定派何處便本色何處便輕贍  
何處無害重難何處須加輕省寓足用之法定徵納之  
期除官米照舊折色外民米不拘官戶民戶米多米寡  
通行扣算起運項下免軍南淮折銀折布存留項下親  
王郡王祿米軍衛有司學校俸糧俱以一石為率細扣  
某項正耗各該銀米各若干會總若干每石總扣各該



銀米各若干止作二項填寫由帖使人戶據總而出糧里分類而納應自運者仍自運應糧里者仍糧里俯從民便仰給公輸食鹽錢鈔除老幼殘疾免徵外實在丁口選的當府官或風力知縣通查某縣某圖某戶丁口若干通該若干寫定花名數目將該縣額解錢鈔通扣該用若干丁口可足若有餘剩孤貧及下下戶量與省免毋容市民大戶用幸造定徵冊照丁催徵五年一次改造寓消耗於省口隸歸一於限年庶官存原額民感

寬征補物料之重以紓民力之困其徵收解戶將見年  
里長丁糧最上之家開具大縣八名中縣六名小縣四  
名各註畧節行檢申布政司於內點僉大縣四名中縣  
三名小縣二名候下年管收不許勢豪私囑公役陰圖  
市民幸保完日通解布政司類解中間若有未盡宜從  
徑自叅處使一弊不留官民兩便等因備抄移咨到職  
案查節准本司咨奉巡視案驗批呈俱為坐派稅糧等  
事已經遵奉查派造成草冊繳報今准前因會同將南

昌等一十三府南昌等六十九縣稅糧除官米照舊徵收折銀外其餘民米不分官戶民戶糧多糧少俱照各色則例一體均派若縣分富庶及舟楫可通量撥重難縣分貧難及舟楫不通量加輕省其銀米加耗及車船雇脚盤剥搬運等用廣咨詳處條折類合逐一扣編由帖具式行註俵散使人戶據是而出糧里據是而徵官司據是而考其欠納過徵之弊其各縣戶口食鹽錢鈔徵收事則亦就各該稅糧冊後備開明白令其遵照今

將弘治十六年並弘治十七年以後年分派徵稅糧文冊造完咨繳等因備咨轉呈到臣案照前事該臣巡視江西節該欽奉敕江西盜賊之起委由賦役不均官司坐派稅糧等項往往徇情畏勢陰佑巨室貽累小民以致窮困無聊相率為盜爾須悉心訪察痛革弊端務在平徭均賦以甦小民困苦欽此欽遵已經行委各官會查編派均徭去後今據前因會同巡按御史姜實議得立法救弊莫貴乎始之詳詳則節目易見又莫貴乎終

之簡簡則綱領易知今各官林泮黃皞會處前項稅糧  
鹽鈔本折例派既以杜飛洒之奸存起地方又以適險  
夷之便以正數兼耗費以一石例升斗總收類納條理  
可尋上賦下供毫粒無爽而由帖分散家喻戶曉糧一  
石者即知該納米幾斗銀幾錢糧一斗者即知該納米  
幾升銀幾分出過其數則為糧里多徵不及其數則為  
人戶欠納存留兼派本折積歲餘以補歲用之缺子粒  
先儘衛所核歲實以杜歲納之虧至於鹽鈔扣足額則

虛冒莫售其奸丁口審量免則困窮重蒙其惠數具成冊用革濫徵解選良民潛消侵囑他如起運輸納之期里運自納之便因事立則摘隱發幽若刻實寬若繁實簡誠為官民兩便其周防剋不過奸汙官吏糧里私蠹而已持而循之人戶所省一年約銀五六十萬但壞於貪冗則盡廢毀於異同則中更又非今日所能預料合無准照編定均徭里甲事則行布政司將前冊騰發南昌府支給官錢雇募翻刊印刷送司鈐記每府縣掌

印管糧各發一本仍令各府自備紙劄將凡例並該屬  
縣分稅糧鹽鈔則例刷印回府鈐記發各糧長一本俱  
相承收照其人戶願自印者聽從其便使則例廣傳上  
下通曉而宿弊一清其弘治十六年稅糧坐派已遲合  
暫行屬依派其弘治十七年以後俱候奏請定奪再照  
江西左布政使林泮清而苦勞而謙晦密慎勤超絕倫  
類左叅議黃皞謹實明亮克稱才猷其編派稅糧鹽鈔  
可謂竭盡心思而推算筆削之勞皞尤任之故臣得藉

手塞責伏望聖明特敕該部詳議具覆乞賜裁處頒下  
遵行使小民均惠而臣等任怨亦為不孤若行之年久  
又有應正事宜務經撫巡議奏以杜吏奸林泮黃皞量  
加旌擢以勵官能緣係巡視節該奉欽依務在平徭均  
賦以甦小民困苦及修政本以弭大盜並勵官能事理  
未敢擅便除行江西布政司備造奏啓文冊徑自奏繳  
青冊呈送戶部查照及將平徭役另本具題外為此會  
本謹題請旨



均平丁糧徭役疏

題為修政本以弭大盜事據江西布政司呈准本司右  
布政使柳應辰咨准本司咨奉巡視案驗據本職並江  
西按察司副使沈銳呈送定處過均徭里甲草冊到院  
看得凡例簡嚴條議周悉但編派均徭丁糧處置里甲  
銀兩雖云濫設加汰而省若未多缺額盡填而徵猶過  
重民難慮始法在圖終欲垂永久更在精詳仰抄案回  
司即行原委官員將發去草冊再行查議改過各項總

數條件再行查算編補均徭銀兩再行酌處廩給庫子  
弓兵名數先賢忠臣等祭祀查明增損其餘可革可因  
從宜審處作急完報等因備咨到職案照前事咨奉巡  
視案驗行據南昌等一十三府掌印知府等官祝瀚各  
親齎查過縣屬丁糧里甲均徭揭帖前來查審差有銀  
力而均徭混編里有大小而煎銷概出田不論等利倍  
而同科戶不論則富懸而例派況大縣四五百里小縣  
五六七里大者差遞增而猶輕小者差遞減而猶重不

差五斗以優下戶顧起洒糧之奸第免雜差以優仕籍  
顧藏寄籍之託必欲一清宿弊須在深計熟籌除量加  
去取省令各官執帖前來外看得布政司右布政使柳  
應辰按察司副使沈銳精練老成擬合選委仰各抄案  
回司即行各官別擇寬靜去處令祝瀚等會聚交謀同  
仁均視合各縣以通融盡一方之繫矩所損所益務當  
務均議定回府各官逐旋會查某府某縣歲派里甲原  
額若干不論里大小家貧富止憑丁糧定派人一丁若

干糧一石若干使如原額扣定額派弓箭弦條並祭祀  
鄉飲孤老等留縣支用其餘盡數解府類解布政司編  
附流水號簿將歲派黃白蠟皮張等項一應物料並戶  
禮工三部近年加派通約可勾若干尚欠若干應於均  
徭編補又將某縣歲編均徭解戶柴薪皂隸弓兵巡攔  
斗級門子庫子館夫馬夫渡夫防夫鋪司鋪兵等項銀  
力各幾差力差折估與銀差通該若干又將進表須知  
科貢盤纏牌坊勻派通該若干一縣一府一省分計總

計並補物料共該若干方將各府丁糧除事例應免之外糧不分升合並假託寄莊俱田分三等高者重出低者輕出丁兼論事產並同籍異門俱丁分九則上上重差下下免差又如九江南康等小府星子瑞金等小縣力差尚難銀差應為別派吉安饒州等大府豐城鄱陽等大縣銀差尚輕物料應令編補撫糧輕而田濶派多不過袁糧重而田狹派寡非偏府縣正佐柴薪馬夫別派以別官嫌司屬大小力差近編以從民便搏量三年

五年一編之處默符十年一編之差先以凡例次以額數又次以編審徵解存留編補使鑿鑿可考永遠可行務盡逐年之丁糧僅勾逐年之差使毋編餘剩以便侵漁此外別有相應宜從徑自增損等因備咨到職已經會同於永寧寺寬靜處所督同知府祝瀚等查議均當就令回府各職仍於本寺逐一遵照案驗事理將均徭丁糧通融編派里甲銀兩酌量查處類造草冊繳報去後今准前因催據南昌等府將各驛廩給庫子巡司弓

兵等項可增可減名數並先賢忠臣等祠祭祀名項各  
開報前來會同按察司副使沈銳再將發回草冊逐一  
查議除遵照改定編處補其濫設重徵未盡汰者汰之  
未盡減者減之並他可增可損可因可革逐一酌處惟  
求省費兼取便民今將定處事宜類分條例其類有五  
一曰編派查處凡例計五十闕條備載沿革及查處編  
立革弊則例二曰編派均徭條格計闕條備載差役  
總類欵目及編派優免則例三曰編派均徭定額計六

十九縣總為一條各分其目備載差役名項及丁糧派銀編差編補料價定數四曰查處里甲銀數計

闕

條備載各縣額派弓箭弦條祭祀鄉飲孤貧布疋有無勾欠及酌派足用定數五曰預計坐派料價計

闕

條總查均徭里甲派撥編補以備坐派物料定數夫條格所以揭定額之綱定額所以著條格之目查處所以立預計之體預計所以實查處之用條格定額皆為均徭而設查處預計皆為里甲而設凡例則總括四類而



領袖貫通其間者也均徭里甲立則大要如此若奉行得人則徭役不累偏差里甲不憂重派乞為詳擇發屬遵行使有司守畫一之規小民解用三之困等因造冊咨繳到臣案照先為前事該臣巡視江西節該欽奉敕江西盜賊之起委由賦役不均官司坐派稅糧等項徃徃徇情畏勢陰佑巨室貽累小民以致窮困無聊相率為盜爾須悉心訪察痛革弊端務在平徭均賦以甦小民困苦欽此欽遵已經行委各官編派續據呈繳草冊

前來又經案行再加詳處去後今呈前因會同巡按監察御史姜實議照官有庶役國有常供勢不可缺而取必在民然非有以均節之於力必困財必窮而人心必失今日江西之盜熾非由此者耶幸逢聖明量包天地怒震雷霆醜類革心渠魁授首耄孺蘇息欣際少康然悠久之計根本之論則平徭均賦毋復餘矣臣等仰宣德意慎付官能除稅糧鹽鈔別委幹理外而均徭里甲既合各府之長復重二司之託惟欲經畫國計解紓民

隱今柳應辰沈銳處編造繳寸量銖較縷析毫分盡一  
年之丁糧定一年之差使叅之戶則田則定以銀差力  
差杜飛洒則見糧有差杜餘剩則補料有數杜妄費則  
進表須知科貢盤纏牌坊有定額縣有大小而輕重默  
符年有疎密而勞逸默運格目具而混淆以清額數定  
而名銀可考以縣視縣而一府均以府視府而一省均  
固不涉違道以虧公亦不專庇貧而抑富一年而論差  
約減二千四百餘差銀約減四萬七千餘兩其量除丁

糧優免官吏生員等家並貧難極下人戶丁計八萬一千餘丁糧計四萬九千餘石則又不在編差之限而均徭比舊輕矣里甲均見年丁糧而出則里無大小人得其平按舊額出辦而徵則銀無增損官持其要先儘額派軍需物料祭祀鄉飲孤貧則存留定數易查其餘辦料並均徭補料銀兩類解使司流水附簿則起解定數易考人民難於拖欠官吏難於侵沒物料分類齊解上得實用事整而不見其勞解戶因類總斂下無重擾事

約而不涉於濫在官所減雖無定數可稽在民所省約以數萬為計則里甲比舊輕矣至於各項罷行之法概可揭查通融殫乎心力因革契乎事宜詳而可見簡而易知其澄弊大致在杜絕官吏恣濫僉存餘剩多徵盜費而已但任法不如任人固難保奉行之皆至如皂隸馬夫自私者或不利於調派牌坊盤費要譽者或輒擬於加增則法必更而民必加病至他異同亦非今日所能逆覩者也合行布政司將前冊騰發南昌府支給官

錢雇募翻刊印刷送司鈐記分送鎮巡按察司並守巡各道及分發府縣各一本相承存照各府自備紙劄將凡例並該屬縣差額等項印回鈐記通年轉發編審均徭里甲官員查照人民願自印者聽從其便使則例廣傳上下通曉宿弊一清其弘治十七年均徭里甲編派已遲合暫行屬依派其弘治十八年以後俱候奏請明文定奪再照江西布政司右布政使柳應辰廉慎公勤政事精練按察司副使沈銳謹密沈敏刑名深歷其編

派均徭里甲可謂細入毫毛而比類分條之勤應辰尤  
任之故臣得以因人成事伏望特敕該部詳議具覆凡  
定過一應差徭調解補料不許一役濫僉一事改派一  
丁一合餘剩一兩加添其盤纏牌坊名目兩數之外牌  
坊除官府壯觀損壞修理外其餘俱係一時作興不許  
再作人情修理違者官作不謹罷免受者坐贓治罪庶  
政例嚴一風清弊絕而為國為民任怨亦為不孤其柳  
應辰沈銳伏乞量加旌擢以勵官能緣係巡視節該奉

欽依務在平徭均賦以甦小民困苦及修政本以弭大盜並勵官能事理未敢擅便除行江西布政司備造奏啓文冊徑自奏繳青冊呈送戶部查照及將均糧賦一事另本具題外為此會本謹題請旨

守制乞免關勘合疏

奏為乞恩守制等事臣罪疊盈積禍延臣母今年七月二十八日在家病故八月十五日訃聞五內分崩攀號慟絕臣出二年乞歸五疏亦預虞在此也今臣母不可



作矣臣父今年七十有四久患風疾重罹哀感事切可  
虞臣質弱服勞遭此凶變疾疢轉亟血氣乾枯手足風  
痺神魂散失要亦旦夕間人即欲匍匐就道關領勘合  
緣已不能動止誠恐客死於外臣既誤臣母不無又誤  
臣父雖切報國之心將亦與身俱滅伏望聖恩矜憫乞  
敕該部查臣前後奏疏容臣住關勘合回還守制兼侍  
父湯藥臣倘前病不痊服滿容臣致仕臣死生不勝感  
戴天恩之至謹具奏聞弘治十六年十一月二十一日

少師兼太子太師吏部尚書馬文升題奉聖旨林俊著  
照例守制欽此

回話疏

奏為乞恩認罪回話事臣准刑部咨備該部題為欺慢  
朝廷失誤慶賀事該寧王奏弘治十六年七月初三日  
恭遇萬壽聖節慶賀官員數少點得指揮等官吳漢等  
三十六員生耆吏典張璽等五百一十七名不到叅奏  
提問及叅臣不應先於本年六月二十七日出巡乞降

敕戒諭等因奏行該部擬查臣果有無故迂避情由徑  
自奏請具題節該奉聖旨王所奏林俊事情著他從實  
回將話來欽此欽遵備咨到臣天威下臨魂魄飛散方  
裂肝而灑血尤叫天以望憐疎妄罪浮輸情敢隱臣聞  
各省凡遇慶賀惟三司掌印官會城行禮鎮巡守巡公  
差等官隨在行禮非不欲俱集省城或事勢不可緩或  
地方不可離往返旬月為誤非細又別省巡撫或可安  
坐遙制江西適當多事臣節該欽奉敕江西賊情重大

爾至彼設法撫捕務令盡絕江西各府地方盜賊成羣肆行劫掠毒害善良近來尤甚特命爾巡撫各該府縣時常往來巡視欽此欽遵臣感激思奮為國分憂期盡歷郡縣盡掃兇賊以紓民急以仰答上恩瑞州最急則巡瑞州撫州次急又巡撫州取道建昌朝益王殿下發進賢遇南康九江饑民搶穀報至遂由饒州趨南康九江順巡南昌屬縣又巡瑞州聞饒州搶穀又起撫州賊又作臣又趨饒州道省城欽奉敕勘事督催守巡先赴

又督府所掌印巡捕立限緝拏又委知府指揮協撫會  
捕臣留督拏奉新越獄南昌豐城建昌劫財殺人等強  
盜條災異預備等章奏均徭里甲稅糧鹽鈔等事宜屯  
田等案驗發粟以賑民饑賤糴以平米價接審訟獄舉  
行社約禁導風俗政務甫隙即同清理屯田給事中湯  
禮敬監察御史張津員外郎趙履祥俱於本年六月二  
十七日出巡臣在撫州行慶賀禮又由建昌朝益王殿  
下盡歷屬縣又踏勘長寧縣治又由饒州巡浮梁忘寢

食觸虎豹犯波濤假晝夜之驅馳易日力以理事甫八閱月巡八郡三十七縣賊多之地或再至或三至或住七八日或十餘日險僻山縣自來不見巡撫守巡罕至臣皆親蒞吳城毛竹山弘山等處賊巢臣憑仗皇靈單車深入宣示威德或草宿荒舍或五鼓抵城積苦服勞鬚髮盡白猶以不能安地方副陛下任使為懼臣豈容頃刻圖安即粗迹之瘁勤驗素懷之忠愛恭遇聖節實切懽欣齊三祝於嵩呼稱九如於天保臣豈敢無故迂

避又隨在行禮故事具存湯禮敬等三人是日同出似  
亦有據但寧殿下素負賢名好古下士臣未至江西荷  
蒙吹譽既至荷蒙優待加常臣感激受知亟圖愛助而  
自安率直竟涉猜嫌猶蒙寬假僅請戒諭陛下憐臣螻  
蟻未即行誅容臣自實臣悔罪服辜實當萬死不勝戰  
慄怖恐之至緣係乞恩認罪及節該奉欽依從實回將  
話來事理謹具奏聞

申明處置地方疏

奏為申明處置地方事臣聞地有遠近故治有詳畧以  
天下言中國近而外域遠也故治詳中國而畧外夷以  
一方言內地近而邊域遠也故治詳內地而畧邊域盖  
詳可以制畧而畧斷不可以制詳治之勢亦治之體也  
江西原無專設巡撫後因南贛二府與湖廣福建廣東  
三邊相連流賊搆患議設都御史贛州居住控制三邊  
其職專在督捕盜賊填安疆陲非若巡撫軍衛有司錢  
穀兵馬刑名徭役學校農桑吏奸民隱皆其職也前于



此江西之沿革韓雍閔珪均有可觀則巡撫之驗也後  
乎此贛州之處分金澤亦有可觀則提督之驗也其後  
金澤改江西巡撫仍督三邊便見疎越韓邦問繼之又  
見疎越積忤召尤竟為言者所劾此畧不可制詳之明  
鑒也三邊流賊出沒無時劫縣攻城乃其常態既控三  
邊勢不得不住于贛隔江西千百餘里聲息往返動經  
半月臆度遙處豈能猝中事會顧彼失此勢難兩兼更  
欲旁州僻邑歲時週歷宣上恩汰官弊親問民所疾苦


又甚難者臣觀湖廣之鄖陽控河陝諸邊故湖廣之巡撫鄖陽之撫治毋害並置而山陝之榆林寧夏大同宣府各有巡撫提督均是意也以臣愚見都御史不預巡撫專令提督三邊贛州居住江西歲差南京侍郎或都御史一員更代巡視務在遍歷宣示恩德察覽風俗興革利弊事妥奏停使詳畧相宜各便行事如蒙准題乞勅該部覆議可否奏取聖裁緣係陳言處置地方事理謹具奏聞

辭免再起江西巡撫疏

都察院右僉都御史臣林俊謹奏為乞恩辭職致仕事  
臣准公移荷蒙聖恩陞都察院右副都御史巡撫江西  
及臣前疏辭免行取乞容致仕又不蒙允者自天有命  
無地措躬伏念臣起自諸生誤承驅使清階數轉感恩  
遇之已踰小力重煩念身衰之獨早自為按察使即已  
嬰心骸骨委分林泉矣幸際聖明垂仁棄物我孝宗屢  
有起廢之命我皇上又有收召之恩今又有此遷除兼

趣視事臣非木石豈不深加感激而思效涓埃哉緣臣始末本懷屢亦具見辭疏臣父近尤耄耗臣近尤衰頹風濕轉深痰瘡間作視昏聽重體弱神疲在情事既如彼在精力又如此加以江西地方即今多事尤非病廢可支徒深假退求進之嫌無切循名責實之望臣揣微分難冒顯融如蒙伏望聖慈俯察哀懇追回右副都御史成命容臣舊職致仕以養臣父終餘年特敕吏部別推賢能奏充巡撫臣無任感激求憐之至具本該通政

使司官奏奉聖旨林俊屢引疾乞休情詞懇切准致仕  
吏部知道欽此



見素集奏議卷二

欽定四庫全書

集部

見素集奏議卷三

詳校官中書臣賈鏊

中書臣劉源溥覆勘

覆校官中書臣汪學金

校對官助教臣蔡鎮

謄錄監生臣羅善慶

欽定四庫全書

見素集奏議卷三

明 林俊 撰

奏議七篇

西征稿

預處地方容令致仕疏

欽差巡撫四川等處地方都察院右副都御史臣林俊  
謹奏為乞恩選任風力預處地方容令照舊致仕事正



德五年二月初一日節該欽奉敕近來四川地方盜賊縱橫今特命爾巡撫兼理松潘安綿建昌等處邊備撫安兵民如遇寇盜量調官兵民快相機勦捕陝西漢中湖廣荆襄等處交界地方流賊出沒遇有警急亦宜發兵應援星馳前去以紓朕西顧之憂欽此欽遵本月初四日又節該欽奉敕四川流賊劉烈等四出搶掠侵入陝西漢中西鄉縣等處地方殺人劫財僭稱王號勢漸猖獗誠恐愈難撲滅今特命爾親詣夔州一帶選委謀

勇官員統領官軍民快相機截殺或搗其巢穴或離其  
黨與或出奇制勝黏蹤追襲鄰境交界之處或有緊急  
互相策應一應錢糧軍馬等項便宜區處務期克獲以  
收全功欽此欽遵聞命怖惶感深有泣仰天自誓義不  
與此賊俱生謹遵吏部題准五日嚴程於本月初五日  
興疾上道兼程前去外切念臣先在雲南感患風濕在  
湖廣轉加沉重自此因疾累疏乞休正德元年十二月  
奏奉聖旨林俊屢引疾乞休情詞懇切准致仕欽此欽

導臣猷畝餘年皆陛下之賜也近因父憂致毀風氣日深衆疾交作無十日不病無十日不藥耳重目昏脚痿齒脫精神耄耗臨事健忘許國朴忠抱素心於葵藿嬰身宿疾逼暮景於桑榆竊恐計乏萬全術疎三畧辜負任使致誤地方未免煩聖朝西顧之慮伏望皇上天地之量日月之明為地方至計特敕吏部另推精力才智官員簡命前來代臣巡撫遵照分定地方相機策應撫捕盜賊容臣照舊回籍致仕以終殘喘不勝感懼求憐

之至謹具奏聞奉聖旨吏部便看了來說欽此該本部  
題稱本官素負重名年力正堪委用且聞命就道日兼  
數程大臣器度濟急才識即此可徵所據陳乞致仕難  
以准理等因奉聖旨是

通江捷音疏

題為捷音事伏以苗民弗靈虞帝陳兩階之舞獫狁孔  
熾周宣興六月之師自古聖君賢辟德柔威斂同功而  
異用也皇上出震嚮離握乾撫泰重華丕冒於六合羣

醜偶縱於三巴流賊藍廷瑞鄔本恕等烏合數萬盜竊名器紅巾扇焰赤地為墟皇上宅以至仁包之大度而彼頑弗率愈沸愈騰皇上軫念民恫兵不可已命總兵官毛倫視荆南都御史黃寶視關南太監羅籥視川之東北廟算周悉比臣起廢視師則羅籥與御史陳鍾左叅政曹祥僉事李恕已奏川東之捷羅籥又與御史俞縉布按二司左布政使高崇熙按察使丁養浩等經紀兵餉御史胡珙方德懋陳祥叶贊成事曹祥李恕守東

達以斷走寧之路都指揮僉事徐繼僉事郝綰知府邵  
黃守廣利以斷投番之路左叅議黃瓚僉事錢朝鳳署  
都指揮僉事陸震駐兵通江大小關隘把扼無遺分畫  
已定而尚書洪鍾近有總制之命監璋近代黃寶毛倫  
近有水寇之捷軍聲益振臣異懦迂生深勤撫議而賊  
跡豺斂賊心狐疑毒熱薰蒸疫痢大作病死逾萬食盡  
勢窮脅從日以解散賊老人四十八營舊黨聚哭分為  
二支藍廷瑞與最惡廖惠等一支擬據保寧鄆本恕巴

州李老人等一支擬據漢中攻鄖陽由荆襄而下正德五年六月通江孤城山水衝塌臣亟促修砌兵火之地雇募無人預虞有變連發四支之兵本月二十日一支先到本月二十一日廖惠等果來劫縣倉卒輕敵致入破城錢朝鳳陸震指揮郭敦知縣魏應時等隨即逃走賊殺人放火當有公差官兵回縣賊疑救兵相率回營縣治學舍倉庫分司未動賊被兵夫在陣殺死六名高橋紅崖等處分路射死七十三名生擒二名逐趕淹死

五十四名奪獲騾馬一十頭匹賊殺兵快一十五名市  
民四十六名口本日接管分守左參議公勉仁帶同二  
支之兵將至通江聞變退回又遇三支四支之兵又行  
退回屯駐右垵臣復發儼回石砦等兵節督公勉仁前  
進會同錢朝鳳犒新兵收散卒勵以忠義示以必死儼  
回石砦激發先赴本月二十四日公勉仁方離右垵本  
月二十五日諜報賊至錢朝鳳驚跌水溝陸震驚失心  
俱尋走計鄉夫抗聲大義錢朝鳳愧止本月二十六日



辰時賊併力謀據通江坐食倉糧不意我兵已振錢朝鳳烟燉一陣儼回箭無虛發賊總甲王三等九名應弦而死兵夫乘勝敵斬一十五名跳崖跌死一名餘賊敗衄本日午時公勉仁之兵復從廟埝子架梁連鬪數陣射殺八名擒賊老人廖光子賊總甲高保兒等五名本月二十七日錢朝鳳又遣儼回石砭鄉夫助陣龍灘河偶漲賊賣蹤過灘機正可乘公勉仁擁兵不追儼回鄉夫奮勇追趕殺死賊總甲王法林王月林王月聰王四

王五等並生擒跳崖跌死淹死自本月二十一起至本月止共計擒斬八百四名口跌死五百九十四名口淹死五百五十七名口沈水漂流不計其數奪獲騾馬七十五頭匹續調羅回標手又到又發知府張敏何珊統領同指揮曹昱王英知縣李相率同鄉夫前追本月二十九日張敏追至門鎮子直扼其前兵僅千餘賊幾二萬連戰二陣本年七月初一日又戰二陣俱捷賊探兵少商量要包我兵赤身散坐石砧三千餘兵背馱後

至誤入其營被賊圍殺石砭殺賊一十一名賊殺石砭  
八名傷九名石砭走出復入張敏營內賊方來鬪何珊  
等兵會鄉夫林集各賊畏懼藍廷瑞一萬餘人賣蹤先  
奔紅口廖惠等七千餘人敗後拒鬪張敏兵分為三橫  
衝賊陣何珊等兵為後應各賊披靡乘勝追逐殺死人  
馬重疊落崖三條溪溝俱滿大溪十里流水俱紅錢朝  
鳳兵亦尋會殺死賊老人廖麻子麻六兒饒老人李老  
人冷老人並藍廷瑞廖惠妻及搜山擒斬自縊自六月

二十九日起至本月止共計擒斬八百七十一名口走  
回被擄男婦六百餘名口殺落溪溝張敏等追賊不及  
查數老人馮進英等報約有三千餘人本月初二等日  
鄉夫陳大俊典史陳浩等生擒廖惠並小老人王仲甫  
小甲張彪徐珠等及斬首共計三百五十一名口陸續  
奪獲騾馬一千餘頭匹及腦包賊衣等件審據廖惠口  
供手下約有七千在陣擒斬殺跌身死走脫不及七八  
十人與進英所報相近除廖惠王仲甫監問解京餘審

真賊軍前斬首與賊級梟掛被虜脇從情重量發充軍  
情輕給親賊妻給配騾馬衣服財物給賞有功兵夫器  
械給軍銅印旗號入官張敏何珊等仍領官兵追過陝  
西西鄉縣務在掃平另報功次行勘的實及錢朝鳳公  
勉仁陸震等另叅外臣竊觀賊勢本盛彌月之間病死  
逾萬散亦數千一偶也賊營故遠竟之授首縣門頗省  
供饋二偶也雲陰下垂我營不暴河水忽漲彼渡多淹  
三偶也賊首廖惠廖麻子麻六兒最惡不聽招撫俱先

擒戮四偶也原調酉陽各處精兵未集遽收全勝五偶也茲蓋仰賴祖宗之靈朝廷之福皇上神威聖武至誠格天之致然賊本良民所司不善拊馭致失其始臣又不善招徠致失其終昔宋臣曹彬下江南不殺一人臣化賊弗效雖則因人就緒有餘愧焉第鋒刃之下善惡豈能盡分而首虜弗尚全活亦為稍衆斯臣所藉手報答者也無任隕越愧懼之至緣係捷音事理謹具題知  
叅駁楊友謀復官職衙門疏節畧

題為乞恩俯順夷情請給印信保復衙門承襲官職撫  
理地方等事據分巡川東道僉事李恕呈據委官重慶  
衛指揮聶霆重慶府檢校郭勝呈會同貴州平越衛指  
揮高貴審勘楊友男楊弘承襲緣由到臣緣在先臣處  
無行近節准兵部咨該播州宣慰使司所屬黃平安撫  
司被殺土官楊才義男楊政賢奏稱楊友男借湖廣臻  
洞長官劉暹苗兵八百餘衆募進重安城詐傳朝廷釋  
放將土官張銳馮經等追趕出城勘官四川左叅議黃

瓚僉事陳睭圍逼奏印等情又為陳情分豁事為陳情懇乞天恩優憐殘喘以安邊夷事該保寧羈管革職土官楊友奏要還職承襲等因又為苗人聚眾挾讐捉殺土官等事該巡按貴州監察御史吳棋奏楊友與黃平安撫司土官楊才挾讐節要捉殺正德四年閏九月十二日忽有天苗萬餘到城將楊才私宅燒燬家人六名並楊才殺死割頭去訖及黃平天苗天志等告黃平所曹指揮聚集殘賊燒死各寨夷民三十六名虜去男婦



四十八名牛馬牲畜三百七十頭匹並箱籠銀兩衣服等情各奏行兵部節查為異省貪官主令故縱糾拽苗人趕殺土民燒燬房屋感動苗夷劫虜家財奪占衙門擾亂地方急救生靈等事該播州重安長官司土官張銳奏又為建言地方事該監生吳卿為保固地方事該貴州麻哈州知州嚴傑等各奏要將安寧宣撫司再設革任楊友宥罪降印令其撫安夷民等因該部行准巡撫四川劉都御史咨稱勘得成化十一年已故宣慰楊

輝將庶長楊友奏保設立安寧宣撫司分管寨分楊輝  
故後楊友與楊愛互相訐奏差刑部左侍郎何喬新錦  
衣衛指揮劉綱親臨會勘將楊友並宣撫司革罷經今  
二十餘年地方頗寧若要設立誠恐有蹈前失及該部  
節叅楊友係先年安置保寧閒住人數今乃擅歸舊治  
意欲復管苗衆及楊政賢所奏楊友謀同殺害楊才事  
理非輕合無仍行湖廣川貴三省鎮巡等官從公會勘  
查處等因節該題奉欽依是著鎮巡等官上緊會勘明

白奏來定奪著各該鎮巡等官上緊從公會勘奏告事  
情議處停當奏來定奪毋致再詞欽此欽遵備咨到臣  
叅看流土承襲祖職法有定規舍餘奏添衙門名為召  
亂楊友連年兄弟讐殺會勘奏革積禍始消且兄弟尚  
爾為讐夷民何因感德縱使得衆徒長亂階乃敢擅離  
遷所巧駕誣詞財買吳卿嚴傑之奏保奸弊昭然節經  
巡撫兵部之查叅是非明甚况楊友見今殺逐宣慰避  
逃何名息怨挾留守巡奏印重肆兇頑固首惡之貫盈

亦羣邪之唆扇各宜追究大正典刑但係夷苗及原奏  
本院無行今奏俱應議處已行布按二司轉行分巡會  
勘去後續據按察司呈同都布按三司掌印官都指揮  
僉事徐繼左布政使潘楷按察使丁養浩議得播州宣  
慰使司凱離天苗為害始於革職楊友之奸謀成於異  
省劉暹之叶助糾綫苗夷動以干計既逐重安等司之  
長官遂據其城又殺黃平司之同知並繫其父人民為  
其攻劫田土被其占耕計其所為惡貫已極因此該司

並各被害官司人民合詞奏訴及照楊友先年犯罪法所當誅荷國厚恩羈管間住日積月累奸計漸生植黨據巢要挾官職雖云自相讐殺實則自速刑誅據此而言均為有罪但宣慰司累次告鳴情詞懇切官雖徒設民則何辜又天壩等苗夷衆口一詞願復舊治楊友雖在擯棄楊弘尚可收錄一則救民於水火之中一則定亂於搶攘之際合無委官親詣從公集議只今重複開設是否於地方有益人民無害應否改屬等因到臣看

得楊友逃避山林不服拘喚節次結構苗夷侵疆越界  
殺官劫財擾亂地方或殺千三百餘人或虜萬二千餘  
口或全殺數戶或全虜數家楊友應正謀叛斬絞凌遲  
之刑其子楊弘應坐給付功臣之家為奴之典各官會  
議明稱楊友貫惡已極卻又朦朧議稱楊友雖在擯棄  
楊弘尚可收錄定處重復開設衙門前後情詞自相矛  
盾臣又查叅楊友逋囚扇禍虎吞諸夷罪惡貫盈但念  
治夷宜畧未即行誅奚至復長亂階重議衙門建置地

方禍患責將誰歸扶綱常申大義議處通呈定奪未報  
續又據播州宣慰使司節申楊友邀引外夷越境爭謀  
地方等因該臣訪得楊斌取盡鎔銖剝連肌髓大失苗  
心楊友犬羊故性狼虎元兇大興亂首土官奢爵下寨  
長任唐等黨邪害正傷類敗羣大乖隣好亦由罔識禮  
度罔知綱常罔接正人罔聞正論合行開諭楊斌楊友  
奢爵並任唐等俱要洗心滌慮守分安常楊斌易濁為  
廉收苗夷既失之心楊友易逆為順消家族已危之禍

奢爵任唐等易野為靖結隣境親睦之情況楊友構兵  
結怨奪地殺官延禍邊陲身為倡亂之首已遲謀叛之  
誅誰敢為之保勘奏立衙門官職是非利害甚明宜回  
保寧安家樂業永享太平如再違拗楊友並助亂自當  
奏調官兵勦滅噍類無遺楊斌奢爵亦當奏革祖職設  
立流官以為叛逆助惡及不恤苗夷之戒行令遵依去  
後續據永寧宣撫司申楊友結黨讐殺劫掠已經呈稟  
上司撫勘未結隨准兵部咨該播州赤水里土官頭目



袁瑚奏楊友聚衆黨惡流劫等情奏奉欽依都察院行勘務見明白授狀坐視不行的一併叅了來說備咨到臣案候奏人未到隨據播州宣慰使司差長官劉彬齎繳造完被害夷民文冊到臣備審劉彬供稱成化年間楊輝溺愛楊友被長官張淵頭目何清徐泰馮瞰左道蠱惑指倚臨邊天壩千山苗讐忿將重安舊管熟苗凱離等五十二寨並容山舊管崖門等二十五寨概住隨風反叛具奏興師挾撫被徐泰等扶同扇誘苗人捏稱

投認楊友管束為詞誑哄本官強奪前寨奏設安寧宣撫司並懷遠宣化二長官司修築城池起蓋衙門役調數多衆苗怨恨成化十五年聚衆攻燒懷遠長官司靖南堡殺死守備土官男婦百十餘人後楊輝病故楊友通同張淵謀害嫡弟宣慰楊愛奏差三司何侍郎等會同鎮巡親臨勘處將張淵張深問狎獠造妖言謀害人命重罪處決叅照楊輝不合溺愛庶妾之子濫設無益衙門引惹邊釁及開設衙門之時楊友年方一十三歲

本以驥童冒功受職與楊愛搆怨同處一州必致互相殺戮將楊友連家小遷發保寧府羈管閒住革罷宣撫等司衙門印信奏繳將重安長官司遷入安寧城內居住迄今二十餘年邊釁頓息近年以來被楊友希圖復任賄結隣境貴州所屬鎮遠施秉邛水等縣無藉軍生吳卿等假以建言為名朦朧代奏蒙行川貴撫按勘議不必添設備由回咨兵部查奏立案不行正德三年忽被楊友令家人石長子等潛結劉遲借兵募進重安城

內大張聲勢奪占城池節申上司未蒙會處以致楊友  
窺伺本年九月內棄脫保寧逃回重安大肆逞威僭封  
天苗都把事名色分投糾拽隣境各處山苗萬衆突入  
黃平草塘二安撫司白泥容山等長官司地方張打旗  
號殺降官民詐稱敕旨以烏江為界黃平等五司地方  
撥與管束敢有不順斬草除根各司安撫長官挈家奔  
投鑽遠避難止有同知楊才固守楊友節次差人逼勒  
宣慰父子保復其官給還印信如有不從定統苗兵過

江攻殺一人不留只得曲保楊友又差家人監同去京  
具奏正德四年六月蒙分守川東道按臨撫勘先給告  
示發屬曉諭各苗革化歸附原管官司募被楊友奸計  
輒請二司進興隆衛約會貴州該道議處乘機聚眾困  
逼二司挾要出與再設衙門降印保官其子文書遂為  
得計統領眾苗突攻黃平守禦所城捉虜揚才碎剝身  
屍砍頭去訖本年十月起至今正德五年二月以來募  
被奢爵管下任唐阿曉等先後聚領玃獠兇蠻四萬餘

衆分投各路攻劫播州所屬各苗打話去年以來楊友  
刻木送書與奢主人借軍助殺你播州言斷許我殺到  
何處占到何處節申鎮巡三司議處未蒙發兵救援致  
被得肆本年三四月以來復聚苗入境流劫其勢尤甚  
生靈肝腦塗地等因又據重慶府綦江縣申為苗賊出  
境事被蘭州等處苗賊前來梁村等處流劫王旻等五  
百餘家虜去男婦十餘口殺死王伸等八名客商不計  
其數又將安穩里野茶坎高羨宗等家盡行劫殺聲言

要往扶歡三溪等處各苗口稱前來借路往保寧府刼  
取楊友家眷回還等因除行該府將楊友家人婢妾存  
留看守家財房屋妻子密切差官護送按察司收候防  
守外臣叅看土官地界多至一月程途安寧去播州僅  
六餘日何名別開衙門土官軍功不過厚加金幣楊友  
征山苗僅十餘歲何功應保官職而楊輝之溺愛欺罔  
自明安寧設立衙門官職夷亂如彼革罷衙門官職夷  
靖如此今楊友謀復之奸始萌奪殺之禍大熾而衙門

之建置利害又明易曰天澤履君子以辯上下定民志  
昔唐徇行伍置主帥任藩鎮邀朝命姑息成風禍亂莫  
救今楊友逋播小夷構黨跋扈殺官奪寨大啓亂階若  
非明正典刑誠恐效尤難制但四川見征藍五又征楊  
友不無勞人伏望聖明力止亂源特敕該部查議將楊  
友助兵代奏流土羣黨行湖廣四川撫巡各按所屬查  
提官武職降二級總旗降軍與軍各調邊衛帶俸著役  
文職與土民監生各發口外為民土官奢爵王鳳儀革



冠帶楊斌降宣慰使嚴限文書到日為始三月之內捕  
拏楊友楊弘石長子王小童並各苗惡首天保川等同  
劉暹金洪楊春楊璽楊淳等各解官查審各該勘官有  
無賄囑亦就查提依律問罪情輕先行摘發情重奏請  
發落殺虜人口財物燒燬房屋一依土俗陪償撫處停  
當奢爵王鳳儀方復冠帶楊斌方復官職違限不獲及  
各苗仍復為惡奢爵王鳳儀革職楊斌再降二級若仍  
回護致勞我師將土官通行革去另設流官庶法令嚴

明兵糧不費朋邪知懼而邊方可寧緣係禁治羣黨議處叛夷查提職官事理具本謹題請旨

致仕疏

題為懇乞天恩俯容致仕保全殘喘事臣氣體羸薄多疾早衰又因父老且病累乞休致荷蒙俞允私心感幸父子相守畢殘年酬素分陛下造化曲成之賜也不謂罪積緣淺臣父竟見背口血猶紅時月斯邁是日服闋是日有征勦川賊之差義不可辭而精力不可耐謹束

斂衣自隨越四日而離家越月有五日而到夔日兼數  
程衝泥沾濕顛墜日常數四既至軍務叢委臣才短愈  
見勞憊每發兵則終夜不睡痢疾尋痊痰嗽繼作時發  
潮熱停刻無容休養即今風濕日深聽日重視日瞶心  
日健忘血氣日虛胃日弱粥食日以少進譬如老馬力  
盡策之而弗前腐根之木非雨濡露沐所能液潤之也  
恐即死無足副上意伏賴神謨渠魁日漸授首餘亦釜  
中之魚劉臬非死即逃杳無聲迹似亦未足深憂而安

寧揚友之亂諸番之警郡縣盜賊之竊發尚厯聖懷然  
巡撫得人禍患亦弭臣實老加病力難強支雖上恩浩  
蕩若在優容而下屬觀瞻自知非雅況臣一應錢糧出  
納俱付廉謹委官自不經手別無違礙伏望聖明憫臣  
衰老之甚特敕吏部查照養病都御史高明征閩事例  
容臣班師順回致仕使啓衾骸骨得遂故山又陛下造  
化曲成之賜也奄奄斷息愧伸一報以無期耿耿幽魂  
特先百神而助順無任懇切求憐之至正德五年十月

二十日奏奉聖旨林俊才行素著多効功勤方切委用  
宜用心勦捕賊寇撫安地方所辭不允吏部知道

奪獲流賊印刀疏

題為殺敗流賊奪獲印刀事據領兵川東道左叅政曹  
祥僉事李恕川北道知府張敏何珊呈正德五年六等  
月蒙巡撫行委各領漢土官兵截殺大夥流賊藍廷瑞  
鄔本恕等各兵節勝賊節敗追過陝西大巴山西鄉石  
泉金州地方會合陝兵截殺獲功節報開奏外本年八

月二十三日賊圍陝兵川兵儼回等救出又發酉陽冉  
舜臣兵遠從賊後衝殺斬獲兩耳小功五十四副各賊  
計窮渡任河不得將被虜婦女騾馬砍死分作二夥藍  
廷瑞一夥從小石河黃瓜溪要衝金州鄢本恕一夥從  
三十六盤要衝二州埡康總兵統領湖兵萬餘在金州  
梁山雲陽奉節義官徐敬之等統民快弩手三千六百  
在二州埡各守把川陝會同康總兵許領湖兵黃瓜溪  
夾攻不會前來曹祥李恕領冉舜臣並石砭馬徽等兵

為前哨張敏何珊領羅回大渡河標手達新等兵為後哨分路追殺本月二十七日藍廷瑞訪知金州有兵陝西三十六盤無兵又合鄆本恕從雞鳴坡黃瓜溪將虜去男婦二百餘人放散砍木搭橋越過本盤因見陟峻沿途並崖下跌死人馬數百本月二十八日到麻柳壩藍廷瑞見二州堽有兵難衝議要聽撫最惡老人王三兒怪說你起的事我殺了母親祭旗跟你如何退悔先殺了你藍廷瑞懼怕王三兒領賊當前衝關被徐敬之

等敵鬪掀放搥石打死王三兒並各賊不計其數生擒四名本年九月初一日賊願丟騾馬金銀買路徐敬之不從又與敵陣斬獲長脚王老人等五十餘級奪獲腦包五十箇並絮被衣服等件追至小關子賊走過河淹死三百餘人生擒鄆本恕男鄆統發解賊八十餘騎跟奪只得砍死本月初二日賊分夥前來自邠至酉連鬪七陣俱敗藍廷瑞因見官兵追近向賊聲說如今再無別路衝不過便死在此詐來打話你不放我過關拜你



四拜退去陝西莫要追趕各兵輕信急緩彼力猛衝將徐敬之胥旺殺死餘兵鑽林被賊尋殺五六十人奪燒米四十餘石醫官張錦自刎身死陝兵就麻柳壩駐劄川兵追過土垵雞公灘本月初八日冉舜臣兵斬獲耳功七十二副生擒四名馬徽冉鵬兵斬獲耳功一十一副生擒六名本月初九日追至雞公嶺冉舜臣兵敵斬掠陣徐老人等耳功三十六副生擒二名馬徽冉輔兵斬獲六副生擒三名汪林丁祥楊鎮何仁各一副張漢

向銀生擒二口本月十一日賊奔湖陝城口山界川兵  
追襲本月十四日至巴河口賊二起九人探風被冉舜  
臣兵斬獲耳功八副鄉夫龐襲宗殺一人不割報功軍  
人謝受等擒獲二口本月二十二日追至繡雞嶺吏何  
定同達縣勇手奮勇過河賊多兵少齊趕到河何定赤  
身水中執弓對射賊方退隔江架梁遇冉舜臣馬徽魯  
忠田金並旗牌官王來譚宣督兵俱到何定率同過河  
衝破賊陣追敵二十餘里落水淹死不計其數斬獲耳

功二百三十九副生擒二十四名至風扇堽藍廷瑞設  
酒請鄆本恕議降鄆本恕又怪要殺嗔說再看如何大  
寧分開一兩人逃走亦易賊老營極高架梁冉舜臣兵  
呐喊徑衝上梁各賊大敗走上高觀山官兵在陝口各  
劄營本月二十四日早賊分前後左三支衝營馬聰先  
期發兵架梁酉陽石砭羅回等漢土兵亦分三支迎擊  
賊又大敗乘勝追至高觀寺敵鬪何定領兵要衝老營  
尋無路道本月二十五日馬徽兵奮勇衝營賊來追趕

張敏何珊儼回將賊射退譚宣等兵又會監廷瑞鄆本  
恕見得馬徽兵近疑是賊勝回還歡喜問信被馬徽等  
兵趕殺官兵從後放銃吶喊西風甚急聲震如崩賊又  
大敗登山架梁冉舜臣兵追趕賊搥石打傷二兵各兵  
奮勇直衝上梁賊丟下男女五六百人騾馬八千餘匹  
阻塞路道領兵官督令各土兵將騾馬砍死直趕過山  
斬獲耳功二百三十三副衝鋒老人蕭伯瓊奪獲監廷  
瑞偽號順天王管軍萬戶府偽印一顆何定奪獲關公

大刀一把未刻字偽稱玉印即水晶印一顆周畿奪獲  
景泰元年天威一千一百二十四號頒降不知何衙門  
碗口大銅銃一口重一十一斤藍廷瑞隨身金銀三駄  
被兵溷搶一駄藍廷瑞荒張賊衆六人扶伊逃走餘賊  
追趕下崖跌死男婦騾馬不計其數三溝俱滿土兵鄉  
夫四人下崖砍殺未盡強賊內有少婦二口壓在馬下  
叫說藍鄢老人妻小俱在溝底帶有金銀一十八斤你  
來救我各兵拖扯不動見有強賊身騎白馬前來天色

亦晚只得俱退收拾未盡騾馬尚六千為因追賊地遠糧夫難到日久缺食將馬亂殺割肉充饑尚約騾馬二千餘匹土兵分收男女審有籍貫給票照回訖各兵回營當夜賊將跌溝人馬通燒未盡藍廷瑞鄢本恕就彼痛哭與妻燒紙因見事迫山險男女累重騾馬難行不忿丟與官兵自行砍死十五歲十六歲男子味溪一處四十餘人密柴河魚洞子二處各三十餘人沿途婦女騾馬數百土兵尚收遺下騾馬四十餘匹藍廷瑞將銀

二獸通行散與手下心腹四十餘賊令各走散至小坎山百丈懸崖前無路道轉彎倒樹一根傍生茅草賊疑木橋向上奔走跌落身死六七百人餘賊男婦尚約二三千人鑽林奔走搜山斬獲耳功一百零九副生擒男婦二十九名口前後奪獲賊旗二十七面賊印銅木共五顆賊批一十五張賊卯簿二扇鐵銃二把賊神八座腦包賊衣護心鎗刀箭袋共二百七十一件其餘鎗牌鞍轡數千路險難搬丟棄山澗各賊奔走松家山馬邊

河分為三夥一夥走湖廣房竹腳跡稍多林密山險無  
路進兵一夥走陝西平利腳跡頗少一夥走大寧腳跡  
亦多發兵把截回路行文湖陝就彼發兵截殺大寧選  
精兵三千追趕餘兵轉蹀其前夾攻等因又據鄉夫范  
金積捉獲賊老人秦景榮總甲吳全捉獲賊總甲徐么  
子并虜去為妻古么女賊從王子賢王伯祥並總旗打  
手地方楊鎮張鸞王海隆周伸方王大宗王金典史涂  
仁捉獲賊男婦劉聰王章廖大益小端公張奉山謝萬



明鄆本聰等及李明通認獲授營王相等共二十一名  
口斬獲耳功四副除跌崖落水等項身死及各土兵收  
留隱匿未報不論外通計耳功八百二十七副生擒九  
十八名口各到臣審據秦景榮等執稱藍廷瑞管軍萬  
戶府印係眉州古樹中檢得不係自造大刀名關王刀  
不知何處得來對賊聲言天賜我印刀佐天大王草寇  
三年因此各賊歸附鄆本恕在小坎山跌死俱難憑信  
二州堽差人數至河下死屍三百四十四軀地方執稱

賊殺兵快約有百人餘俱賊屍其騾馬照依兵法充賞  
土兵子女待兵回官與贖取並解到人賊給發問決釋  
放外切照大巴山星子山三十六盤修立山高眉山黃  
墩望信松家山等處危峻無比秋多積雪皆緣藤接索  
釣崖下上又有陡壁千丈下臨不測之淵荒路一線時  
復中斷獨木引過賊行多墜逆料我兵決不能追不想  
曹祥李恕張敏何珊魚貫猿攀率兵偕進步數里之深  
叢渡踰胷之深水至經絕險慰安前行露宿風餐少壯

成老因此賊敗但最後追奔房竹平利二縣因險中輒  
分屬湖陝之兵亦似一欠臣再督擒勦務期盡絕外叅  
看各賊慘酷兇狂天醜其惡屢致消滅雖惡首未即就  
擒然騾馬垂盡長技已去羣心亦解勢難復盛仰賴皇  
上勇智天錫添設總制督師及將士用命之致臣提兵  
三月尚漏元兇老師費糧深負罪愧除秦景榮監候藍  
廷瑞鄢本恕等各獲問報前後有功漢土官兵通行紀  
功覆實具奏定奪伏望特救該部查議將領兵曹祥李

恕張敏何珊先量具奏旌擢以勵勞臣緣係殺敗流賊  
奪獲印刀及旌擢勞臣事理謹題請旨

災異處置地方疏

題為災異事據保寧府通江縣申正德五年六月初十  
日辰時分本縣對面隔河壁山無故山崩石墜聲如震  
雷本年九月二十四日申酉時分縣西新築城垣城門  
內外無故地裂土縫縱橫文如劈斧思當流賊擾攘之  
際值二異常之變民心驚惶誠恐有關時運人事到臣

案照先據成都府威州申本年七月十五日巳時分本  
州地震如雷自西而起向東而去茂州申本日同時地  
震有聲自東而起向西而去潼川州樂至縣申本年九  
月十九日寅時分地震街市房屋俱動夔州府申本年  
六月二十日午時大竈民謝得安家火起延燒居民房  
屋一千餘家重慶府酆都縣申本年七月二十六日夜  
一更時分天墜火星蘇么老屋上隨即火起惡風大發  
將本家並街坊三百二十餘家並本縣儒學公解泮宮

坊牌鄧陵驛城樓城門鼓樓板房等項俱各延燒重慶  
府申本年十一月二十一日天色陰晦當夜戌時迅雷  
大震閃電交作人民驚駭等因前來及查本年三月初  
二日午時分夔州府並雲陽縣同日地震本年四月二  
十六日巳時分通江縣鸚哥鋪營頭星隆大如斗尾長  
丈餘碎星附其尾等因已經具題外今該前因臣叅看  
天宜順而熒惑營頭為崇雷電作於冬月至不順也地  
宜靜而山崩地裂地震至不靜也是皆政急兵起土崩

之兆夫天道人事常相孚四川古稱多盜亂必居先平  
必居後在漢有公孫述在宋有孟昶在國朝有明昇皆  
最後服其他王小波板楯張弘白馬胡瀘州夷與近時  
劉千斤趙鐸野王剛石和尚羅端公楊亨小楊兒党廷  
方監四之徒不可枚舉然皆無如今日之甚訪問故老  
委因賊臣劉瑾故亂天下以資逆謀革巡撫兵備撫民  
巡捕統理專理俱無其官守巡巡歷難週強盜乘時生  
發此盜之所由起也荒旱連歲不容奏災盜賊四起不

容奏聞此盜之所由盛也慘毒兇狠拏官罰米緝事取禽鳥等物騙索無厭賊瑾取之官官取之民手下差遣又因為利剥民至骨盡離其心此盜之所由縱也興師動衆居送行齎不勝楚毒貧民重困視官如仇至越名分輕公法刼縣殺官擒戮方面而無畏夫賊瑾所致夔保強賊五七餘萬三省夾攻勢已大挫僅二三千人軍兵從後急追尚能收拾散盜敵殺一方面一典史攻刼三縣治今雖添兵會勦豈能遽絕賊瑾所黨揚友激出



南川之盜數不至千亦能殺一方面一府官二巡檢掠  
執一方面攻殺二縣治今雖集兵擒勦豈能遽盡而播  
州之患又重且大近在旦夕四川倉庫匱竭見今兵餉  
日苦不給而松潘各邊月告無糧調運不休他變必作  
臣恐首亂者致亂而救亂者亦生亂況臣出入賊區巡  
撫政務無暇經理自念分甘一壑迹久付於雲泉詔起  
兩川命重懸於鋒刃然鞠躬盡瘁繼之以死臣所能也  
至於成敗利鈍非臣所能逆覩伏望聖明垂念地方亂

之甚易而救之甚難將賊瑾賊銀量發數萬差官前來賑濟以收川民既離之心敕戶部從宜區處各布政司兩直隸那借官銀共二十萬兩以實川邊及軍儲等用稍輕舊則限定生員入監知印承差吏典叅充各名數行令自願納銀以足補為限四川生員入監亦定名數並知印承差吏典義官各納銀以高厚城垣修蓋被賊燒燬公廨舖舍等項及增實各倉預備之穀以足用為限擇委有司督理守巡督查俱出雇買不科役民一財

一力其清軍監察御史政務頗暇專令督察毋容貪濁  
乘機迫納及科索起送公堂紙劄並尅落重派虛費等  
弊敕兵部會府部大臣議處楊友衙門官職應否與復  
明白奏請毋仍展轉行勘致誤地方若不應復乞降榜  
文曉諭川貴湖廣附近播州流土衙門不許暗助楊友  
為亂其楊友果能革心悔罪宥以一家死罪回居保寧  
安享太平應得田產此賣彼置兩斷往來永杜後禍如  
再叛違決行征勦黨惡助亂法在不赦以絕楊友妄覲

之念楊斌謀陞按察司官職亦行革去手下助惡科斂  
家人管事並楊友助惡殺害家人苗頭撫到官如法究  
治以釋苗民剝削戕戮之忿敕吏部專任才名風力司  
府等官及會推公謹忠亮精力大臣簡命一員前來巡  
撫臣專討盜賊天幸成功得貸萬死容歸骸骨庶官使  
得人民困可蘇盜賊可息邊患可消而天變可回緣係  
災異及處置地方等項事理謹題請旨

江津捷音疏

題為捷音事節據領兵副使何珊呈正德五年十等月  
蒙巡撫委同守備大壩以都指揮體統行事指揮李蔭  
帶同舍人韓恩等領兵征勦攻打縣治執戮方面流賊  
曹甫等除節獲首級四十三顆副生擒一十一名口殺  
死一百七十八名馬四十七匹開報具題外本年十二  
月賊移黃艤驛聲言要攻瀘州曹甫曹濬黨么兒稱總  
兵設郊簿揀選殺手四百六十九名編立旗甲餘外投  
營被虜男婦約二千人架梁發哨擅打報帖僭稱順泰

王明正元年統兵來瀘州仰掌印官多備糧草伺候及  
逼州城聲言官備銀三千兩城內鄉官大戶湊銀二擔  
買免攻城該續委分巡副使蔡鍊同何珊李蔭嚴加守  
把巡撫節行撫諭本月初九日曹甫等對州沙灣詐願  
聽撫蔡鍊等令韓恩同伊弟韓懋乘船江中撫講韓懋  
尋復登岸面會曹甫陽順陰違蔡鍊等又拘曹甫戶長  
曹永金等招撫曹甫將緣段旗一面上書青帝旗帶見  
蔡鍊說稱本月十二日二百餘人赴州聽撫要備酒席

當早曹甫又不願撫同已殺弟曹瑄領賊流劫小市廂  
李蔭同韓恩領儼回等兵過江敵鬪斬獲曹瑄等首級  
一十八顆生擒四名奪獲馬二十六匹腦包弓鎗賊衣  
共一十八件本月二十三日李蔭追至史壩驛敵鬪一  
十二陣斬獲首級並兩耳小功共四顆副生擒四名殺  
死未砍首級八名射傷十名射傷馬一十餘匹奪獲腦  
包弓鎗賊衣一十一件本月二十五日各賊仍移江津  
馬鞍山幸家壩胡玉璽等家分割七營聲言要攻重慶

巡撫議令蔡鍊同叅議錢朝鳳固守瀘敘催兵督餉何  
珊李蔭追賊江津正德六年正月初一日巡撫親督酉  
陽播州土兵前來江津通發李蔭添領本月初二日寅  
時攻破黨么兒等四營斬獲首級一百九十一顆兩耳  
小功一副生擒賊婦二口奪獲腦包一十二箇騾馬三  
十一頭匹另外砍死騾馬三十頭匹餘賊敗入人家土  
兵圍守放火燒死三十餘人李蔭同從征重慶衛指揮  
汪洋張勇將功驗訖酉陽土兵乘勝再搗老營曹甫等



設伏死戰土兵稍卻殺死汪洋並兵夫四十餘人執去瀘州衛百戶胡經播州長官王塤江津義官江都賊知大挫併入胡玉璽家大營令方四張孫兒汪鵬同趙金統對面方山劄二小營逼令王塤依寓願撫呈文與胡經等送回巡撫又差生員傅禮入營撫諭曹甫執要銀二千兩贖取王塤及與重慶住食不肯分散巡撫令李蔭統領土兵四千六百餘名並鄉夫等兵進合山坪與賊相隔一十五里劄營軍令先射馬次射人又恐淹殺

老幼令傳禮進營挾撫曹甫等愈加生抔大言我俱是  
老殺手隨他土兵總是不怕傳禮回報本月十二日五  
更時分曹甫探知精兵在營江津守兵輒脆議發一支  
拒敵兵營另發一支勇漢二百騎徑衝江津三十騎先  
鋒出哨不意巡撫督催李蔭兵三支先進至佛子崖與  
賊相遇標手將穿紅突陣賊首白馬標倒斃回等奮勇  
敵斬一十五級餘賊追逐不及回報我兵圍住老營賊  
方知覺倉卒閉門備馬出戰被王塤誑說兵多不好出


巡撫實要招撫我與你退兵乘機走出指點土兵一齊  
放火及上房敵鬪巡撫又委書吏軍牢並楊瑋韓恩等  
催兵各殊死戰斬獲各首曹甫曹濬曹弼曹珣曹玉何  
裁縫張端公張外郎曹永興周黑子李寨長王長生曹  
珠汪鵬但廷秀等首級並兩耳小功共五百一顆副殺  
死未割首級不准功二百九十名生擒賊從並曹甫妾  
陳氏曹濬妾楊氏曹珠妻張氏曹玉妻党氏曹瑄妻任  
氏張外郎妻王氏但廷秀妻張氏周四妻徐氏等三十

五名收回被虜老幼男婦七百二十名口燒死九百餘  
名口奪獲騾馬八百餘頭匹斬獲騾馬四十二尾腦包  
八十箇賊刼簿三扇我兵全勝功級生擒巡撫軍前驗  
發何珊責令賊婦供認賊首各級俱在止有曹甫汪鵬  
但廷秀親見殺死認無首級恐供不實未決存亡惟方  
四等方山二小營走脫簿查正賊方四下僅六十六名  
汪鵬下僅九名張孫兒趙金統下各僅十名又多在陣  
殺死及鄉夫陸續擒斬共七十九名顯在逃正賊似不

及三五十人並被虜老幼男婦不及百餘發兵發牌四處捕捉想難漏脫李蔭楊瑋親驗胡玉璽家住房九十餘間燒死賊屍枕藉數重三日未盡楊氏雖係虜來為妾催兵上陣殺人尤狼等因到臣除楊氏及真賊照奉欽依軍前斬首首級分發梟掛賊屬問發被虜給主騾馬充賞腦包鎗刀馬尾貯庫未獲方四等仍發土兵追勦及嚴督各隘俟等有功官兵另行造冊具奏外臣會同四川鎮守太監韋興巡按監察御史俞繼議照賊首

曹甫曹濬等道誅宿寇大肆猖狂虎鬪邁于魁首梟雄  
挾其絕技蹂躪我數縣睥睨我大州甚至執戮風憲僭  
書名號而無忌兇獷效尤遠近俱震師貞而吉狡三窟  
以徒營天禍其盈收一網而俱盡斯固朝廷之福川蜀  
之幸成此大創者也然臣仰窺聖意以愛人為德而臣  
顧以殺人為功不勝罪愧首末領兵李蔭尤為屢危不  
惡及前征東鄉有功今仍擇委征藍合無將本官量陞  
都指揮僉事職銜以便行事緣係捷音及陞任官員事

理謹題請旨



見素集奏議卷三